

Агар билмасангиз, зикр аҳлидан сўранг!

Шайх Муҳаммад Содиқ Муҳаммад Юсуф



19:08 / 05.06.2020 3766

Савол:

Ўлими яқинлашган кишини қибла томонга юзини мойил қилиб ёки қиблага оёғини қилиб, чалқанча ётқизилади, шу тўғрими?

Жавоб: Бисмиллаҳир Роҳманир Роҳийм

Муҳтазар, суннатга биноан, ўнг ёнбоши билан қиблага қаратиб ётқизилади. Чунки вафот этганидан кейин худди шу ҳолда қабрга қўйилади.

Расулulloҳ соллalloҳу алайҳи васаллам Байтуллоҳ ҳақида:

«У тиригингизнинг ҳам, ўлигингизнинг ҳам қибласидир», деганлар.

Абу Қатода розияллоҳу анҳудан ривоят қилинади:

«Набий соллalloҳу алайҳи васаллам Мадинага келиб, Баро ибн Маърур ҳақида сўрадилар. «Эй Аллоҳнинг Расули, у вафот қилди. Молининг учдан бирини сизга васият қилди. Муҳтазар бўлганида қиблага юзлантиришга

васият қилди», дейилди.

Шунда Расулуллоҳ соллаллоҳу алайҳи васаллам:

«Соф табиатни топибди. Молининг учдан бирини боласига қайтардим», дедилар».

Ҳоким ривоят қилган.

Агар бунинг иложи бўлмаса, у чалқанча ҳолда, юзи ва икки оёғи қиблага қаратиб ётқизилади. Чунки бу ҳолда унинг жағини танғиш, кўзини юмдириш осон бўлади. Маййит қотганда букилиб қолмайди.

Валлоҳу аълам.

«Зикр аҳлидан сўранг» китобидан